

COMUNICATO n. 3574 del 17/12/2024

Traduzione in cimbrio

Studjântzentrum afte autonomian, nominàrt di toalnemmar von Komitatt von espèrte

[Cimbrio] Ma hatt ågeheft auzolega in "Studjântzentrum afte autonomian" boda iz gest khent vorgelekk in trèff bodase iz gest gehalten atz Borghetto in okasiong von 50° gedenkhajar von zboate Statutt vo Autonomi un bidar gekheart vorzolega atz 5 von herbestmånat, in tage boma vairt di Autonomi: pittnan provedimént ågenump an vrait atz 13 von kristmånat, vorgelekk von vorsitzar Fugatti, defatte, da provintziål Djunta hatt nominàrt di toalnemmar, studjös un espèrte, boda bartn soinn drinn in Komitatt boda bart mochan auzmochan bele initziativan zo macha un bia vürzovüarase zo studjara di Autonomi.

“Dar Zentrum bart mochan soinn a punkt bodase bokhennen un boda drauren alle di sèlln boda studjårn odar nåsüachan übar di autonomian von redjonaln Emtar un von autonomen Provintzan. Di Provintz lekk untar vor disan prodjekt di profesionalitét von Komitatt von espèrte, drinn in Komitatt soinda istituzionål vortretar un akademische, guat z’schauga übar an euroredjonahorizont”, ditza hatta khött dar Fugatti.

Stianante nå in kompetentzan zuargètt soinn Amt übar bazta ågeat dar autonomi, dar asesór Simone Marchiori, bart håm in bichtege ruòl drinn in Komitatt zo schupfa vür di arbatn un bart soinn darzuar di pintom zbisnen in Komitatt sèlbart un da provintziål Djunta.

“Dar sèll vo haüt iz dar earst bichtege tritt bodaz vüart auzolega in Studjânt Zentrum: dar ünsar sistèm zo redjrased sèlbart iz gest, un iz no haüt, grüntlich vürzovüara ünsarne lentar un vor daz sèll iz djüst azta von Trentino khemda ågeheft zo übarlega bia zo geba mearar vèrt in an ordinamént boda lekk vorånävür vor earst di Autonomi. Disa initziatìf, defatte, bart mang soinn a baispiel vor alle di åndarn redjongen o”, asó hatta khött dar Marchiori.

Dar zentrum, bartze mochan vürstèlln azpe a pintom zbisnen in istituziongen un di akademischen realtét boda sa haüt arbatn ume dar Autonomi, un bartz mochan tüan atz mearare frönt: åhevante nåzosüacha übar di sistème sèlbartzoredjrased un bia di lokal, natzionål un européan politike sbern aftn ünsar sistèm, dena gianante no vürsnen zo macha khennen di kultür vodar Autonomi un vürzovüara initziativan, tagung, workshop, un no aulegante bizzschaftege debatte un nationål un internatzionáln mittarbatn, legante hërta a dispositziong soinne kompetentzan vor di istituziongen un vor alle in sèlln bosen ågeat.

Dar provedimént boda iz khent ågenump lekk vür ber ’z barta khemmen z’soina toal von Komitatt, vo disan, vor di Provintz barta soinn drinn di djenerål diridjénten von Dipartimént vor di istituzionål sachandarn, antikoruptziong un durchsichtighait Valeria Placidi, boda bart soinn di pintom zbisnen in Komitatt un di åndarn provintziáln strukturm.

Darzuar in asesór Simone Marchiori di åndarn toanemmar soinn dise: dar djenerål dirèktor von Museo Storico von Trentino Giuseppe Ferrandi, boda bart soinn dar koordinator von Komitatt; dar djenerål

sekretardjo vodar Stiftung Bruno Kessler Andrea Simoni; di profesör vodar trianar Universitét Luigi Blanco un Fulvio Cortese; dar nâsüachar vodar Universitét vo Milân Stefano Bruno Galli; di profesören vodar universitét vo Napoli L'Orientale Floriana Galluccio, di profesören vodar universitét vo Innsbruck Esther Happacher, di vorantbörtlich von nâsüachknopf von Bund Institut vo Eurac Research Elisabeth Alber.

Di toalnemmar hãm alle khött ke da nemmen å; ma mocht khön ke vor disa arbat barta nicht khemmen auzgezalt, ma lai darkhennt daz sèll boda mage khemmen gezert von toalnemmar.

Übarsetzt von Schaltarle vor di zung von Toalkamou vodar Zimbar Hoachebene

(cdt)